



Sabtu, 14 Agustus 2021

Ogen: Jesaya 46:4



Kuangkip Janah Kukelini Kam



W Nakku ingetlah maka tanku si enggo ngirgir e mbarenda si nulangi kam man, naheku si lanai ngasup erjingsang enda mbarenda si ngajari kam tedis dengen erdalan, gurungku si enggo mbengkun enda mbarenda si ngembah-ngembah kam, dengen mataku si enggo seleng enda mbarena mekatep la tunduh erkiteken kam kurang sehatna. Emaka ula kal aku rawai kune lanai tengteng penamakan tanku e nakan ku bas babah, tatah kal aku i bas erjingsang sabap naheku enggo nggirgir, gegehku pe enggo urak". Enda me surat keleng ate sekalak nande si enggo Saitun.

Renungenta wari enda nuriken kerna keleng ate Dibata e setia man bangsaNa. "Aku kap Dibatandu, emaka Kuembah-embah kam, seh kam metua janah ubanen, Aku si njadikan kam, emaka Kutatang-tatang, Kuangkip-angkip, janah Ku kelengi". Enda me pengakun, dengen perbahanen Dibata. Dibata e bali ras bapa si tuhu-tuhu encidahken kekelengenna si mbagesna kempak anak-anakNa. Kuembah-embah, kutatang-tatang dengen kuangkip-angkip nggambarkan perbahanen orang tua nandangi anakna. Janah anak si iangkip dengen iembah orang tuana nggejapkan kehangaten dengen ketenengen. Ndauh kerina kebiaren i bas anak e adi ia iampu orang tuana.

Kita Moria enggo mbelin, bekas doah didongken lampas mbelin, lampas gedang i bas orang tuanta, janah seh paksana genduari kita ibere gegeh rikut ras kesempatan guna encidahken kekelengenta man orang tuanta. Seh kal malemna ate orang tua adi anak mehamat man bana, emaka marilah si cidahken kehamaten rikut ras kekelengenta man orang tuanta entahpe saitun i bas Gerejanta alu nginget ia, notokenca bagepe mereken perhatianta man banna. Terlebih-lebih i bas wari ulang tahun Saitun tanggal 15 Agustus wari pepagi. Mari si ukurken kai nge ndia banci silakoken segelah malem atena.

